

國
朝
文
錄

水田居文錄引

水田居文集永新賀子翼先生著先生少以時文擅名與南昌萬茂先徐巨源陳士業諸公相切磋身丁國變隱伏不出遂一意讀書觀史爲詩古文詞此集有文無詩史論二卷往往發前人未發之覆筆意浩瀚髣髴蘇家他文則意製峭詭往往山盡水窮別有天地而詞氣則沉浸醲郁含英咀華亦或嬉酣淋漓蕭然筆墨之外有似歐陽公者有似柳子厚者有似孫樵劉蛻李商隱劉禹錫諸人者蓋兼三唐之長而奄有六朝之勝吉郡近來文集殆蔑有過之者也獨怪先生與魏叔子同時吉贛又相距密邇叔子且奔

走吳越訪求天下逸士高人而叔子集中無一語及先生先生集中亦無一語及魏氏兄弟彼此若不相知者抑獨何歟予於是益有味乎先生之文且有味乎先生之人矣先生又有所著激書近始得讀予寶爲枕祕包大令慎伯見之謂當共之天下有心人卽謀付刻上高李祖陶撰

水田居文集目錄

卷一

廉頗論

韓非論二

項羽論一

漢高光武合論

彭越論

賈誼蘇軾合論

漢武帝論二

張禹論

楊雄論一

孫權論

二周古文合刻序

心遠堂詩自序

水田居詩自序

皆園集序

卷二

譚烈婦入磚記

文溪映雪菴記

周孝子割股記

顏山農先生傳

龍公孝行傳

與友人論文書一

與友人論文書二

忝兒一

復程天修

與周白山

卷之八
答友人論文一

自書近詩後

族姪小琮墓誌銘

曹娥叔先雄兩孝女辨

水田居文錄卷一

永新賀貽孫子翼著

後學上高李祖陶欽

從弟祖文煥

○ ○ 廉頗論

古之大臣當強敵。○ 愚陵之際。○ 蓋有必然之防焉。○ 又有不必然之慮焉。○ 有必然之防。○ 故其備密。○ 有不必然之慮。○ 故其圖周。○ 備密而圖周。○ 然後猝然臨事而不驚。○ 無故變生而不亂。○ 昔者秦昭王誑趙。○ 約與趙惠文王會於澠池。○ 王與廉頗。○ 藺相如謀行。○ 則恐受欺。○ 不行。○ 則示趙弱。○ 乃盛爲之備。○ 令藺相如從行。○ 而以廉頗居守。○ 廉頗送王至境。

與王訣曰王行度道里會遇之禮畢還不過三十日三十日不還請立太子爲王以絕秦望王許之及至澠池秦知趙盛設兵有備會畢不敢有加於趙君子是以知廉頗非僅行伍中人也殆有古大臣之風矣夫國家所最患者莫大乎以君與敵而復與敵市君也吾無君而求君則敵必以君爲市及吾有新君而復求舊君則敵必以吾舊君爲市吾不求舊君而舊君自求入焉則敵必納舊君以與吾新君爲市展轉相市地削民疲是不戰而國自亡也今廉頗既與王訣而許之矣卽不幸而有變奉舊君之命立新君以絕秦望則前之三患俱亡矣又況其行而有備也既防其必然又

慮其不必然。秦雖欲誑趙而不可得。此頗之所以爲大臣也。其後秦昭王復以誑趙者誑楚矣。武關之約。猶澠池之會也。楚懷王信子蘭之言而行。秦詐以一將軍號爲秦王。劫懷王入秦。設令是時楚臣如有廉頗者。能以與趙王訣者。訣于楚王。王必狐疑不行。卽行而有備。王必不陷而入秦。卽陷而入秦。而王旣許楚臣立新君。以絕秦望矣。必不求歸。而以巫黔中之地許盟。至走死秦地。而楚禍不解也。楚之諸臣不爲其備而聽其行。是猶制虎者無救傷之。其輕身以嘗其搏噬。其媿於廉頗也多矣。猶幸齊人歸楚太子橫。得立爲王。又幸而懷王死。楚人曰。賴宗廟社稷之靈。國有君矣。楚

無求於秦○秦亦不能挾舊君爲市者○是昭睢諸人之後計得也○吾獨怪南宋諸臣○既立高宗矣○猶令敵人得挾二帝爲市○屢和屢爭○屢盟屢叛○是不獨有媿廉頗并昭睢諸人之不若也○悲夫○

中間數語○抉出利害處○何等該括○後引楚事反証○亦極分明○作者此等文○殆不減魏叔子○

○韓非論二

陋哉韓非之說秦也。其言曰：秦與荆人戰，大破荆人，隨荆以兵，荆可舉也。而謀臣不爲引兵而退，與荆人和，其無伯王之道一矣。秦破魏，圍梁數旬，魏可舉也。而謀臣不爲引兵而退，與魏人和，其無伯王之道二矣。趙爭韓之上黨，秦以詐殲之於長平，邯鄲可亡也。而謀臣不爲引兵而退，與趙氏和，其無伯王之道三矣。韓子斯言，蓋自多其智，以爲秦之先臣皆計拙而謀失也。噫，何其淺於量秦哉。夫秦之所以成帝業者，以其不急帝也。而其所以吞六國者，以其不盡吞也。秦自孝公以來，據殽函之險，東嚮而制諸侯，緩目前

之小利捐僥倖之微功待時而動乘閒以抵之其陰圖天下也豈一朝一夕之故哉是以孝公之任商鞅也堅守關中務本力農以修耕戰其力可以并韓取魏而不爲也用其詐謀拱手而得西河因韓魏自潰之勢以蠶食之而已及惠王之初北取義渠西并巴蜀南兼漢中獨未嘗東出函谷也久之乃令張儀連橫六國使其從散約解自爲攜貳因而舉兵伐之天下頓首割地以求解於秦秦無亡矢之費而天下已削弱矣昭王之信范雎也遠交而近攻取韓魏膏腴之地乘利取便以用兵于外任白起爲將摧堅挫銳割地包利功屢見矣旣勝而速去之若有所待以用其所未足焉

蓋自孝公至莊襄王凡經六世皆用彊忍堅韌之術以徐收天下之勢故其戰也不傾國以爲戰而常挾戰以要利其和也不委國以爲利而常市利以資戰而其大畧在先收韓以脅趙魏陰驅韓魏以攻齊楚因而圖齊楚離三晉六國恐懼交散援絕然後威劫而得取之故天下皆歛而秦獨靜天下皆勞而秦獨逸天下皆亂而秦獨治蓄積蘊隆至於始皇承累代之威造盛滿之會因席卷之勢如征鳥凌風使翼而莫之天闕也夫豈始皇之才智過其祖父哉其所由來者漸矣譬之奕者取勢布算皆注於全局不貪勝於須臾以爭數子之功故始不遽勝而卒乃至於無敵昔者齊潛

王嘗欲并天下矣。一戰勝燕。遂夷其宗廟。而郡縣其人民。於是天下恐懼。悉起攻齊。燕亦收餘燼以畔之。齊幾以亡。此皆貪勝於須臾。以爭數子之功者也。必如秦者。乃可與布算於全局。彼韓非烏足以知之哉。

秦之得計在范雎。近攻遠交之一言。此更曲曲爲之。寫出堅忍作用。又亦無支詞。

○○項羽論一

韓信謂漢高帝曰、項王爲人、喑噁叱咤、千人自廢、然不能任屬賢將、此特匹夫之勇耳。項王見人恭敬慈愛、言語嘔嘔、人有疾病、涕泣分飲食、至使人有功當封爵者、印刻弊忍、不能予、此所謂婦人之仁也。君子曰、項羽之所以失天下者、韓信已觀其深矣。夫匹夫之勇、婦人之仁、似非可同情而論也。匹夫之勇、其失天下易見而婦人之仁、其失天下也難知。然惟其爲匹夫之勇、是以成其婦人之仁。何也。凡人之情、易怒者必易悲、而悻悻然有一朝之忿者、及其大事當前、反循循然優柔而不能斷、此無他故、患在不忍焉爾。

古之人有大不忍而稱勇者。一怒而安天下之民是也。有大不忍而稱仁者。救民於水火是也。夫惟聖人能以大不忍之心。行大不忍之事。自非聖人。凡有大不忍之心者。必有大忍之力。以濟之。所謂大忍之力者。非以忍吾之所忍。蓋將以不忍吾之所不忍也。白刃加於頸。見流矢則忍之。非忍流矢也。爲其所不忍者。有甚於流矢者也。蝮蛇螫手則斬手。螫足則斬足。非忍於手足也。爲其所不忍者。有大於手足者也。古之豪傑英雄。所以深沈凝固。以成天下事於一旦者。不過能忍而已。而匹夫婦人不然。不忍於事。則傷於勇。傷於勇。則其所爲勇者。不過啗噉叱咤而已矣。不忍於情。則傷

於仁傷於仁。則其所爲仁者。不過言語嘔嘔。與人涕泣。分飲食而
已矣。何則。其所不忍者小也。所不忍者既小。則其所忍者必大。至
於所忍者大。而其敗有不可勝言者矣。須臾之辱。不能忍。而於終
身之媿恥。則將忍之一戰之敗。不能忍。而於社稷之傾覆。則將忍
之一人之怨。不能忍。而於黔首之塗炭。則將忍之。亦惡在其爲不
忍哉。項羽憤田榮之反。齊欲以全力殲齊。使漢王得以乘閒定三
秦。據敖倉。取滎陽。而不顧也。憤黥布之反。九江自畱下邑攻而破
之。使漢王得以乘閒收散卒。據成臯。而不顧也。不忍小怨。而忍大
讎。此其所以爲匹夫之勇也。項羽夜阬秦兵二十萬人。屠咸陽。火

三月不絕及漢王身在掌握者數矣憐而不殺忍於降卒而不忍於仇敵忍於二十萬人而不忍於一人此其所以爲婦人之仁也身敗名滅爲後世笑豈不宜哉昔者勾踐能忍會稽之恥身執桀匱妻執箕箒凡二十年而漢高帝亦能忍滎陽成臯之敗堅壁持久以老楚師然而行成之請夫羞不忍殺勾踐而勾踐忍之於姑蘇鴻門之會項羽不忍殺高帝而高帝忍之於垓下劉項成敗之機固於忍不忍之間決之矣

深識卓論獨寫得磊磊明明可爲千古龜鑒

○漢高帝光武合論

而○邊○平○德○談○首○錄○中○

人君之才不及其臣者貴於樂得其臣而用之人君之才過於臣者貴使臣樂得其君而爲之用樂得其臣而用之則臣之才皆君之才矣故功名歸之臣而事業歸之君使臣樂得其君而爲之用則君之才得以用衆而盡其才矣故事業歸之君而功名亦分歸之臣齊桓公才不及管仲然而齊之霸也不曰管仲而曰桓公以管仲之功名用管仲者爲之也晉文公才過狐趙而能使狐趙樂爲之用然而晉之霸也既美文公而兼稱狐趙以文公之事業樂爲文公用者爲之也知此者可與論漢高光武矣昔高祖椎魯無

文之人也。蓋嘗自言其運籌帷幄不及張良，定國撫民不及蕭何，戰克攻取不及韓信矣。借使高祖諱其椎魯無文，而與三人角智，程勇則高祖窮，而三人亦有時而絀。乃高祖能不自取其智，勇以用三人之智，勇又能合三人之智，勇以爲一人之智，勇而三人莫與爭焉。則是高祖之不及其臣，乃其所以大過其臣者也。至光武則不然，昆陽之戰，邯鄲之克，與夫破銅馬，擊尤，來降盆子，皆出獨斷。而諸臣無與焉。及馮愜之叛，鄧禹也預料誅愜者必黃防，不費一卒而亂人投首，則鄧禹所不及也。賁修之圍於蘭陵也，預敕蓋延提兵出不意，直擣董憲於鄆，及延圍制待憲出兵合圍蘭陵，然

後攻郄則決其弗克。又蓋延所不及也。吳漢之討公孫述也。預敕
堅據廣東。待敵來攻。勿與爭鋒。及漢違制進兵。成都與劉尚相距
二十里。則大驚。以爲輕敵致敗。又漢與劉尚所不及也。藉令以此
自多其智。自勇其斷。天下之才誰敢出其上哉。而光武獨虛懷遜
志。自視歛然。堅王常以金石成。祭遵之威名。用寇恂守河內。則勉
以蕭何關中之勞。用耿弇定祝阿。則獎以韓信下邑之捷。見馮異
澠池之功。則美其收功桑榆。憫賈復五校之傷。則許其男女嫁娶。
使二十八人者。傾心見懷。奮其智勇。感遇風雲。雲臺諸臣。遂與韓
彭蕭曹共垂竹帛。猗與盛哉。吾以是知二帝所以得人也。高祖惟

不自用故能表人之所長光武惟以用人爲自用故能畧人之所
處則在此短高祖之體大故輕士嫚將而人不以爲倨光武之用宏故網舉
目張而人不以爲苛高祖顛倒駕馭有以作豪傑邁往之氣光武
誘掖鼓勵有以結豪傑效忠之心然其得之也皆本諸推誠其任
之也皆存乎器使其驅之策之也皆在於威明平恕豁達簡易東
風至而酒湛澁蓋其感召也深矣彼夫任智挾數矜已凌物者雖
有賢者不能樂得而用之其臣亦驚疑顧畏而不樂爲之用夫既
兩不樂矣功名事業之墮也又多乎哉

一起道盡主意中間分講明白而後復總結之絕妙時文

彭越論

項羽霸西楚。欲有梁地。乃徙魏王豹於河東。爲西魏王。夫以楚之
慄悍。天下莫能當。今復兼梁而有之矣。此時爲漢謀者。必得奇兵
數。撓梁地。爲楚肘腋之患。使之狼顧。內救楚。不能得志於漢。而後
漢可得志於楚。會彭越有衆。無所屬。此天所以資漢也。漢王寧越
將軍印。擊破楚軍。得梁十餘城。遂拜越爲魏相國。將其兵。與齊田
榮。數反楚。於是羽無東意。使高祖得馳騁於滎陽成臯間。此漢取
天下之大機也。及漢兵敗於彭城。越亦亡其十餘城。乃居河上。爲
游兵。擊楚。楚漢相持。越數從梁地。絕楚糧道。漢三年。羽攻越於宛。

越乘間渡睢水下睢陽外黃十七城羽急破走越盡復其城而漢兵已出成皐聲勢再振矣漢四年羽復攻成皐破走漢王越復從梁地大破楚兵下昌邑旁二十餘城得穀二十萬以餉漢軍及羽復引兵破走越漢王因得復入成皐大破留咎軍羽聞之復趨成皐漢兵畏楚盡走險阻越復從梁地絕楚糧道楚軍乏食遂困於垓下越之功可謂奇哉夫越與高祖兩人皆非羽敵也羽來則走羽去則戰與他將戰則皆勝與羽戰則皆敗羽旣破漢越兵復出羽旣破越漢兵復至如兩雌共鬪一雄雄者屢勝而雌者得以時爲休息兩蹇交蹇一駿駿者屢先而蹇者得數弛其轡銜漢角於

前越崎於後而韓信從中收燕魏齊趙蹙其地而擊其疲至垓下而信越黥布諸國之兵盡集欲不覆楚不可得矣嗟夫人但知楚強而漢弱而不知強弱之勢不在一人而在天下也羽以一人敵天下而高祖以天下敵一人楚雖最強烈而黨絕助寡備多力分其強易弱其饒易熄高祖雖弱然能合衆弱以成強則天下皆其強也方其失滎陽而走也得九江王布收兵以入成皐及其失成皐而走也又得韓王信兵引而渡河雖十戰九敗而星羅碁布無非漢兵譬如失水之龍所遇皆水涔涔涓涓皆可召風雷而致雲雨縱使魚服受困而飛騰之勢不衰若夫彭越不過鉅野澤中之

豪而已。以羽拔山蓋世之勇。西楚強大之勢。其視越也。猶鷹鷂之視狐兔也。然而羽騎一出。越卽操兵而扼其後。使羽糧絕。國空。躑躅跂於道路而不休。譬如出林之虎。咆吼虓呌。百樹震動。然進則爲人所格。退則爲熊所搏。進退之間。爲羅所張。虎力已倦。而人熊之怒。方新。安得不陷於垓下之羅哉。故吾謂漢取天下。彭越之功。並於韓信。非過夸也。雖然。越其挽楚勢者。齊也。齊亡之後。齊王廣復爲漢擒。齊田橫逃在海島。不早赦而封之。乃與五百壯士疑而自殺。烏盡弓藏之悲。豈盡韓信也哉。

一持論明確固已而前後雜用譬喻尤近東坡

三層取譬

予于○漢書綱

○ 賈誼蘇軾合論

從古經濟大臣功名垂於後世者豈必盡以書傳哉。其以書傳者。
○此○言○固○當○然○亦○不○可○一○概○而○論○大○代○少○年○事○業○未○必○有
必其平日所行之政所建之猷舉而述之者也。周公相成王舉而
○當○若○老○不○得○志○而○猶○費○以○垂○後○世○前○如○王○特○仲○長○統○後○如○杜○牧
述其治周者若而事。今所傳周官周禮是已。管仲相桓公舉而述
○蘇○老○原○其○言○亦○鑒○鑒○中○病
其治齊者若而事。今所傳海王山權是已。他如晏嬰之春秋商鞅
之耕戰穰苴之兵法以及申不害吳起之書皆是道也。故君子言
其所行而非行其所言行其所言是言於未行之先也。言於未行
之先者嘗試之言也。以嘗試之言爲經濟之言猶畫西施之面挾
之以遊姑蘇之臺徒悅其名而已。吾嘗愛賈誼蘇軾有王佐之畧。

而深惜其言之太早也。賈生少時有新書。而蘇子少時有策畧。此皆未更事變。嘗試于未然而非其所必然也。當賈生之時有晁錯。當蘇子之時有王安石。賈生少時痛哭而陳者政事。錯所指畫而進者亦政事。蘇子少時慷慨而談者富強。安石所擘畫而陳者亦富強。夫以錯與安石挾曠世之才。遇相得之主。言聽計從。其所行之政。所建之猷。與其所著之書。當有不符而合者矣。乃錯用於景帝。而禍及其身。安石用於神宗。而禍及天下。藉令錯幸而不見寵任。安石幸而不爲執政。徒以言語文章流傳人間。錯且以其學與申商齊譽。而安石亦將以其學與荀楊並稱。安知天下不以惜誼。

者惜錯而以惜軾者惜安石哉。惟其不幸而用。是以一蹶而不可復振。乃知錯與安石之言皆嘗試之言也。夫議論之變日新。而事會之來無已。此卽古人所言。尙有不可行於後世者。顧以偏至之辭窮萬事之理。以獨任之見。剗非常之業。雖使吾行吾言。且將扞格而難從。又况欲驅天下以從我之言。此其踳鑿也必深矣。然則賈生蘇子。幸而少不見用耳。使誼之三。表五。餌軾之策。畧策斷。皆得嘗試言之。而嘗試行之。嘗試而不效。則誼與錯並誡。而軾與安石同譏。豈不惜哉。嗟夫。天下非無才之患。而勇於自用其才之患。有才而勇于自用。則視天下無不可爲之事矣。視天下無不可爲。

天下所以終不可爲也。以賈蘇之才。使不勇于自用。待其深歷事變。然後召而大用之。雖王佐何讓焉。既幸而不用。于少時又不幸而終不見用。使徒以嘗試之言傳也。此國家所以不獲經濟之用也。夫

以鼂錯王安石與賈蘇並講。未爲公當以賈蘇皆通人而錯之。險與安石之執。皆非其倫也。然其言自足以消人躁心。挫人銳氣。而壁壘亦極精嚴。

漢武帝論二

漢武帝用桑宏羊領大農、盡管天下鹽鐵、作平準之法、置大農部、丞數十人、分部郡國、令遠方各以其物、如異時商賈所轉販者、爲賦而相灌輸、置平準於京師、受天下委輸、貴則賣之、賤則買之、欲使富商大賈無所侔大利、而萬物不得騰踊、山東漕粟、歲益六百萬石、一歲之中、倉滿餘穀、帛五百萬石、匹民不加賦、而天下用饒、君子曰、天下功罪之名、未易定也、夫固有自後世追數之、則爲罪、而當時較論之、則爲功者矣、追數其罪、罪在撓法、而違其多、福較論其功、功在救時之變、而權其少禍、如平準是也、所謂平準、

豈非言利小人設法以籠天下之貨哉。顧有大不得已者。使武帝元狩以後。皆如建元之初。節事愛民。外無南越東甌西蠻北胡征討之費。內無柏梁建章昆明土木之役。雖百宏羊安所用之。而武帝不能也。豈惟武帝不能。雖直如汲黯。知如東方朔。賢如鄭莊。舉朝之人。杜口袖手而莫救也。豈惟莫救。且有人焉。進鷺爵賣功之策。而吏道雜。有人焉。陳入粟贖罪之計。而奸宄興。有進酎金助祭之說。而列侯困。有獻算舟算車之法。而商賈罷。又有楊可之輩。興告緡之事。御史廷尉分曹往治。侵民財物以億計。奴婢以千萬數。田宅大縣數百頃。小縣百頃。而百姓中家以上皆破矣。于是酷吏

繁興天下騷動其不斬竿揭木起而亡漢者特有待耳當此時而
欲達權通變上不妨武帝功利之圖下可代楊可告緡之禍此不
在正誼明道之君子而在聚斂心計之小人以聚斂小人之謀救
聚斂小人之失權其害輕禍寡聊以紓目前之患者舍平準何由
哉平準行而國用饒告緡算車之令悉罷民得漸休而死于酷吏
者十減其八九矣然則弘羊之策用於建元之初則爲生事而用
於元狩之後則省事也平準之令行於崇儒術舉仲舒召申公之
時則爲倡亂而行於慘急刻深用夏蘭杜周張湯義縱之日則弘
亂也凡人爲善必求其端而止惡必求其漸告緡旣罷則武帝之

意將不止於罷告緡已也。輪臺一悔與平準均輸而俱罷矣。於是代田之制興而搜粟都尉之官設。力本務農以與天下休息。其端皆起于罷告緡而告緡之罷實始於平準。平準之罪著于後世而平準之功重于當時。吾故曰天下功罪之名未易定也。

揣情度勢非謂平準可行實于此時不得不行如此論古才不是一派膚詞。唐肅代間若無劉晏何以佐軍與明啓禎間若有桑宏羊亦不至加賦以病民矣。然則豈惟救聚斂斂人之失卽以應將相大臣之急可也。

○○張禹論

大凡亂人國家者非天下之凶人而天下之庸人也凶人之亂人
國家也人得而知之人得而防之若夫庸人者其識淺其氣卑其
富貴之念熱而身家之慮摯浮沉俯仰與世推移人不得而知之
人不得而防之豈惟不得而防之且將從而輕之而狎之輕之則
以爲無足畏狎之則以爲有可親噫是人也幸而見用於聖世不
過將順取容而已不幸生逢輓季權奸篡逆之臣出而與之共事
利其寬厚之名足以服眾悅其貪鄙之性足以市私彼將頑頓冀
詬惟權奸之所爲而從之然後其禍烈矣漢武帝時委政王氏灾

異迭興、吏民上書皆咎王氏、雖帝亦疑之、獨尊信張禹、欲決于禹之一言、乃駕幸禹第、屏左右而問焉、此漢與王氏廢興之大機也、禹則對以天變深遠難見、新學小生、亂道誤人、宜無聽用、于是上然禹言、不復疑王氏、而漢祚已暗移矣、推禹始願、豈意及此、不過以年老子孫弱、又以請平陵肥牛亭、自爲塚地、恐爲王根所忌、故曲意樹德、欲自圖其子孫無窮之利、而不知其爲劉氏子孫釀無窮之害也、夫人能輕其身、而後能重吾君、而重天下、禹旣視子孫爲重、則視漢祀爲輕、視肥牛亭爲重、則視漢天下爲輕、然則禹以肥牛亭咫尺之地、嚮漢天下、與王氏而以漢之宗祀、博己之宗祀、

也。嗚呼。庸人之禍。乃至此哉。古今庸人。識淺氣卑。以之爲凶人。則不足。以之贊凶人。亂天下。則有餘。故雖不能自爲篡逆。而篡逆之臣。皆欲得之。以爲助。庸人與凶人之禍。固相需而成者也。彼魏之華歆。劉宋之褚淵。王儉。五代之馮道。皆庸人也。而皆足以移人國祚。後人之爲國者。其無以庸人爲不足畏而忽之哉。

權文公謂西漢之亡。亡于張禹。文能究其處心積慮之微。而推其贊凶助篡之實。可謂胸如鏡而筆如刀。

○○○楊雄論一

大凡學聖賢之學者必有豪傑之識而後可以章志明教於天下。荷無豪傑之識而徒以語言文辭學聖賢之學此其人非欺世盜名之小人即同流合污之鄉愿而已矣。昔者楊雄作大玄以準易作法言以準論語豈非以語言文字學聖賢之學者哉。及其作解朝則曰自守泊如而漢史亦言雄清淨無爲不汲汲于富貴不戚戚于貧賤當王莽時不得封侯僅以耆舊爲中大夫。又言雄作法言卒章稱頌莽德且爲劇秦美新之文以頌莽。夫既自守泊如矣而劇秦美新胡爲也哉。雄蓋無豪傑之識而欲學聖賢之學者也。

即從此四字看出全身

學聖賢之學故自守泊如以養望無豪杰之識故劇秦美新以取容然則雄之劇秦美新卽其所爲自守泊如也何也新莽之初阿附者拔擢矣忤恨者摧伏矣雄于此時將違世獨立如龔勝陳咸薛方諸人乎雄不能也將佐成篡逆如甄豐甄邯諸人乎雄不忍也雄之爲人不嗜進亦不勇退不爭得亦不樂失奔競所嫌也正直亦非所尙也奸邪所羞也忠貞亦非所慕也故雖不汲汲于富貴而不辭富貴不戚戚于貧賤而不耽貧賤不稱功頌德于莽未篡之先而不敢不稱功頌德於莽旣篡之後始而三世不徙官泊如而已不求徙也旣而以耆舊爲中大夫不得封侯泊如而已不

求封侯也。終而爲劇秦美新之文。以順時。泊如而已。不求三公與
四輔也。彼所謂泊如者。非能貧賤以終老也。特異于汲汲戚戚者。
云爾。汲汲戚戚者。鄙俗之行。不汲汲戚戚者。聖賢之學也。學聖賢
之貌。而不至窮約終老者。行已清濁之間。斟酌污隆之際。以爲吾
既以語言文字學聖賢之學矣。聖賢之學。因時通變。聖賢之身。豐
厚。藹吉。其體好靜。不能不藉宮室輿馬。以舒展吾筋骸。其神好恬
不能不藉仕宦祿俸。以休養吾榮衛。其性情好文。采辭賦。不能不
藉穠郁美好。以潤澤吾胷臆。而秀發吾天懷。於是內度其身。外度
其勢。欲爲伯夷之清。而難其隘。欲爲柳下惠之和。而難其不恭。欲

國朝文錄
爲汲黯之方而難其隨欲爲東方朔之圖而難其達不夷不惠不黯不朔無可奈何俛仰浮沉是則楊雄而已嗟夫古今此輩所以敢於學聖賢而不敢于爲豪杰者特以聖賢易假而豪傑難假云爾不知豪杰既真則聖賢非假不能爲真豪杰而欲爲假聖賢公論昭然安在其能假哉然則彼所謂自守泊如者安在其能自守泊如也。

楊雄一身推之者謂爲聖人之徒貶之者幾于盜賊之亞皆過分也惟此恰恰寫出不爽鋪毫而氣味亦極淵雅

○ ○ 孫權論

英雄舉事必內度己才外度敵勢故有可藉之資而不恃有可取之利而不爭有所藉者假于不藉故能有其藉也有所取者假于不取故能有其取也是故無兼併之才而圖兼併因以取亡者項羽是也無偏安之才而圖偏安因以取亡者魏懿公孫述是也若夫知不可兼併而不爲兼併知可以偏安而自求偏安是則孫權而已矣昔者孫策臨終以後事附權曰舉江東之衆與天下爭衡卿不如我舉賢任能以保江東我不如卿權之不能兼併也策亦料之矣然其雄俊之姿恢廓之度以之得志于天下則不足禁曹

劉得志于天下。則有餘。乃知鼎足之勢。非曹劉爲之。而孫權爲之也。當曹操破荊州。順流而東也。江東諸將皆欲迎操。設權不用周瑜之謀。則東南之勢。曹操有其八矣。使操畢世不能定東南者。赤壁之戰爲之也。關羽之攻曹仁。破于禁。斬龐德也。自許以南。皆遙應羽。曹氏至。欲遷都以避。設權不用呂蒙之謀。則中原之勢。蜀有六七矣。使蜀畢世不能得中原者。江陵之役爲之也。赤壁之戰。江陵之役。非欲與曹劉爭天下也。不過欲據長江之全勢。以保江東而已。不得荊州。不足以據長江。不據長江。不足以保江東。舍江東而爭天下。則江東亡。舍荊州而保江東。則江東亦亡。旣已據長

江○包○荆○州○矣○而○後○以○雌○爲○雄○以○守○爲○戰○以○不○可○敗○之○道○爲○必○勝○之○
道○波○流○洶○湧○險○足○恃○也○將○士○輯○睦○人○足○恃○也○水○陸○舟○車○技○足○恃○也○
然○甯○終○其○身○爲○自○守○之○兵○終○其○身○爲○三○吳○之○長○而○不○出○長○江○以○圖○
天○下○是○則○權○所○以○爲○偏○安○而○已○矣○彼○曹○操○恃○百○萬○之○衆○挾○天○子○以○
令○諸○侯○西○征○北○伐○老○而○不○倦○先○主○帝○室○之○胄○志○圖○恢○復○雖○蕞○爾○巴○
蜀○輕○用○其○謀○不○能○自○止○彼○其○志○皆○未○嘗○一○日○忘○天○下○也○若○權○者○纂○
漢○之○謀○不○如○曹○操○討○賊○之○志○不○如○先○主○內○度○已○才○外○度○敵○勢○我○不○
自○爲○兼○併○人○亦○不○能○爲○兼○併○我○能○自○爲○偏○安○人○亦○不○得○不○爲○偏○安○
畫○江○爲○限○以○分○三○國○於○衽○席○據○險○爲○疆○以○絆○兩○雄○于○樽○俎○奄○有○荆○

揚帝制自雄。若權者豈非人傑也哉。

此與楊雄論皆肖象而構恰如分墨文亦水到染成絕不費力

○○二周古文合刻序

文章之道。譬之畫家。氣韻本之居體。神彩生于運筆。然而有得于居體。運筆之先者矣。宋元君將畫圖。眾史皆舐毫和墨。獨一史後至。儻儻然不趨。受命不讓。解衣盤礴。元君喜曰。此真畫圖者也。相文士者。亦如是矣。熙朝以舉業爲時文。士子應舉者。束手排比格律。而解衣盤礴之致。始亡矣。其間或有不羈之士。以其才思。旁出于序記書論諸體。別其名曰古文。而科場事迫。歲月難給。父兄師友。動色相戒。以爲舍本逐末。有妨取進。迨至登第服官以後。英華果銳消磨已盡。然後勉強應酬。以充羔雁餽牽之具。而解衣盤礴。

之致又亡矣。獨吾友周疇伍偕其族白山。不然方爲諸生。卽發憤學古文。其文曲折往復。力追唐宋。出以示予。予乃嘆曰。嗟乎。古文之難也。雖以守溪鶴灘之時文領袖一代。及爲古文。遂不能與作者頡頏。乃欲兼而得之。豈非才哉。雖然。吾嘗聞畫水之譜于清狂矣。昔者清狂道人之畫水也。專一于水。不雜他念。一旦倉皇索筆。作烏芻菩薩。以火光三昧降諸魔神。飛烟掣電。有燒夷陵焚赤壁之勢。于是清狂畫火之名。一旦齊于畫水。夫舉業之用排偶格律也。猶畫水者不能無一擺三摺種種成法。然而清狂超軼法外。能游心于居體運筆之先。其于水也。沉酣浸淫。變幻不測。一日之內。

數幅之間魚龍島嶼萬怪出沒既悅奔而怒流復帶縈而鱗蹙忽
跳波而搏雨旋吼石而沸雷倏而同風舟懸帆墜俄焉倒峽天盪
星浮當其大醉奮筆傾倒淋漓之時視彼發硃降魔飛烟掣電之
火渾無以辨夫是以一藝而兼兩長也由此觀之兩君特忌時文
不窮工而極變耳果能窮工而極變其視古文豈果有二道哉今
其古文具在然特一斑耳若其舉業久爲都人所推社事勃興意
氣蒸變遇其解衣盤礴時卽予不敏亦得攘臂振袂于其旁也
予觀自明以來能爲古文者大都能爲時文也人多不解其故
讀先生此文恍然悟矣

○心遠堂詩自序

嗟乎。余每憶亡友萬茂先。陳士業。鄧左之。徐巨源。四子之言。輒不禁涕零也。丙子之秋。余讀書章門。取所爲舉業。出示四子。皆推獎溢分。謂余文開閤變化。不減先輩。而縱橫奇恣。時或過之。場卷出。卽以第一人相期。余聞言。媿甚。及撤棘闈。落乙榜。平日所爲舉業。爲進士持出梓。入房書者。或爲人襲取。以博科名。而余獨不免於窮。四子過余。哂曰。子如夜螢。戴火而寒。余媿滋甚。每從市上望見四子。輒掩面疾趨。羞對其影。歸而賦詩。牢騷感憤。一篇之中。三致意焉。他日左之至螺江。猝入余館。余不及避。發篋得詩。怒然戚也。

曰子胡爲此耶。爲此者必窮而後工。且傳焉。子爲子之舉業。自可不終於窮。而又好爲是窮者之詩。子而窮。則負子舉業。子而不窮。則負子詩。子而欲處於窮與不窮之間。兩負而莫適爲尙。則子詩之傳與不傳。終未可知。而胡爲此耶。余曰。不然。天下事之未可知者。甯有量哉。子不見屠者。屢于藜藿而賣。藿者或過屠門而得肉。市扇者常苦暍。而暍者往而得扇乎。子昔以余之舉業。可以不窮而已。不免於窮矣。又安能知余詩之果窮也。子試把余詩觀之。取其蚘強抗浪。不欲名一家。不肯拘一體。第以快其所欲吐。欲笑欲啼而止者。于此游泳焉。淫液焉。退而定其美惡焉。則其窮與不窮。

雖不可知而其傳與不傳固可知也而又何戚焉左之乃閱余詩
竟命酒浮白拍案狂呼曰余見子詩工矣其傳未可知若其窮則
已知之矣嗟乎遂使四子之言不驗於前而左之一人之言獨驗
於後者誰實爲之命也夫

先生以詩工而窮子雅不欲以詩名詩亦不能工而亦卒不免
于窮也抑又何說

水田居詩自序

一十年前城南有宅爲心遠堂。雖近市囂譁而讀書甚樂。旣雨堂遭兵燬。復讀書於厚田之水田居。厚田土瘠源淺。十日不雨。苗稼常焦。故厚田之田猶石田也。今以水田名居。何哉。蓋田居旣久。聽水爲多。且家在中。介地枕小江。無雨易涸。有雨易汎。雖鮮源也。水亦時潤。每逢上流波漲。隣溪瀾湧。金灘雷吼。石潭電激。江石迅悍。岸又迫之急。不擇流旁溢。派出浸入人家。穿戶蕩宇。魚遊樹杪。船行天上。此一樂也。又或澍雨流膏。平時捲霏網。吾嘗謂斷野絕流。長竿林立。漁火星燦。山腰抱白。天影搖黑。水聲似磬。樹色浮烟。此

純意。心。爲。心。獨。運。六。初。裁。繪。對。之。俱。在。下。風。

又一樂也。至於東作始興。南畝遠灌。陂隄夜障。池塘曉車。桔槔抱
甕。瀾漫不絕。鯽鯉鮎魴。望流而赴。鳬鶩鸕鶿。羣浴以嬉。萬趾于耜。
百口喧豚。魚尾半赤。人首盡黔。此又一樂也。兼此三樂。謂之水田。
不亦宜乎。雖然。前之二樂。源流之田。類皆有之。後此一樂。非余汲
水之田。不能得也。每誦古詩。或奇而肆。或秀以深。或鬱以達。所謂
水田三樂者。古人兼焉。余詩渾淺。每望古人。及涯而返。乃旣名其
居。復以名詩者。蓋竊願學焉。而未逮也。嗟夫。願學古人。豈終不逮。
古人哉。汲水而勤。未有不逮。夫源流也。願學而勤。未有不逮。夫古
人也。風馳雨驟。則波委而雲隨矣。水落石出。則鳥瀾而龍見矣。若

國朝文錄
是者。天人交發。神鬼悉來。雖余不敏。時有弋獲。遇其適意。一篇之中。三樂迭見。更欲進而醇焉。其在異日也。夫。其在異日也。夫。命意迴不猶人措詞亦極意雕琢。此逼真唐人之文。非宋以下所能有也。

○ 皆園集序

古今俠烈之士所以大過人者則存乎膽與氣矣。雖然膽恃氣而後充。義氣所鼓。膽既赴之。孟莊兩賢之書其言養氣者皆諄諄矣。而獨無一語及膽者。膽周○合○旋○看○一身而有相氣塞兩間而無形。孟莊惟能養其無形。以及其有相。故能藐大人卑萬乘而無撓藉。令氣不足充其膽。則雖以十三歲殺人之秦舞陽。及其氣奪于秦王。卽震恐色變。并其平日市井懔懔之膽。一旦失之。又况選懦恒怯嗟呀。嘯喚之徒哉。吾友劉安世成仁取義。生平以膽自許。人亦以膽許之。吾獨謂安世之膽。安世俠烈之氣所充也。蓋嘗讀皆園全集而

益微其爲人矣。安世以英絕之才。俯視一世。杯酒成詩。刻燭作賦。據案走筆。作彈文。莫不排獄創峽。挾風雲而走雷電。操觚之家人。震懼其膽。然吾謂安世詩文之膽。亦皆俠烈之氣之所充也。充而不止。是在善養。昔吾先君子嘗以養氣養膽之說。訓貽孫矣。其言曰。養氣者。養之使老。養膽者。養之使壯。氣老欲其常翁。膽壯欲其常張。以氣取膽。以老用壯。以翁主張。天下無難事矣。間嘗竊取其言。以衡人衡文。鮮不合者。今安世詩文具在。雖其旨激其魄。昌然其行文之勢。則如春水瀾漫。盈科後進。漸放于大壑。此其于養固不習而自得。不符而自合者。藉令天假遐齡。生逢盛世。其詩其

文與其勲名事業。誰爲限量。惜也。遭時不造。止于三十之年。徒以其俠烈膽氣。充于詩文。流傳人間。令讀者追慕贊歎。慷慨流涕。洒沾襟而不能已也。悲夫。

養氣之說。人人能言。養膽之說。則自先生始發。中間以氣馭膽。云云。直欲自成一子。

水田居文錄卷二

永新賀貽孫子翼著

後學止高李祖陶欽之評點

從弟祖傑能之校刊

○譚烈婦八磚記

宋季永新鄉進士彭震龍帥八姓忠義從文信國勤王信國兵敗震龍猶固守永新同邑叛人劉榮者初仕宋爲大將降元引兵屠城震龍等皆死之。是時譚婦趙氏夫婦聞變抱其三歲兒隨舅姑匿學宮。元兵至殺舅姑及其夫。欲汙趙氏。趙氏憤甚抗聲大罵賊怒殺之。并及其子。血流聖殿八磚。若婦人抱嬰兒狀。時元十四年。

七月十九日也。有屠者伏梁上，出爲人言甚悉。久之，有司謁學官，見血磚滌之不去，磨以砂石，又不去，復煅以猛火，乃更鮮明。其後明季知縣某，以歲久磚壞，築土和灰石以塹之，其厚三寸，須臾血痕出，塹上如前狀。至清順治庚子，知縣王登錄後，加塹焉，厚倍於前。塹血痕復出新塹上，如前狀。時已閱三朝四百餘年矣。余乃覩八磚而慨然嘆也。方元兵之下江南也，駭騰雲旌，麾蔽日雷轟，電掃海沸，山搖，豈非一時蓋世之雄哉！然何以力足以斬炎宋磐石之宗，而不足以折閭閻芳烈之氣勢？足以遏錢塘滔天之潮，而不足以滅升斗濺地之血？威足以屈二百州厥角稽首，而不足以

禁○一○婦○人○切○齒○咋○舌○則○是○江○南○已○亡○豪○傑○已○死○而○趙○氏○之○心○獨○不○
死○也○夫○惟○趙○氏○之○心○不○死○是○以○趙○氏○之○血○不○磨○遙○想○其○時○慷○慨○之○
情○憤○罵○之○狀○蓋○已○震○天○地○哭○鬼○神○貫○金○石○而○薄○日○星○矣○入○磚○淋○漓○
豈○偶○然○哉○嗚○呼○傷○矣○火○德○衰○矣○元○運○新○矣○北○轅○駕○矣○南○舟○覆○矣○彼○
亂○臣○賊○子○附○燄○助○虐○以○爲○聲○靈○與○天○無○極○也○豈○知○轉○盼○八○十○年○欲○
求○奇○渥○溫○帝○蹟○雄○圖○於○沙○漠○穹○廬○間○但○有○朔○風○積○雪○凜○人○肌○骨○而○
彼○伯○顏○張○弘○範○諸○人○功○業○旂○常○甲○第○鍾○鼎○鐵○券○帶○礪○已○與○烟○草○同○
其○銷○沒○矣○若○所○謂○叛○人○劉○槃○者○不○但○人○骨○俱○腐○并○其○子○孫○亦○自○削○
其○家○譜○名○字○以○滅○人○耳○目○獨○此○八○磚○殷○殷○班○班○輝○耀○學○宮○千○秋○萬○

世傳之無窮然後知彼時幅員之壯兵威之強以八磚視之不過劍首一映浮游一瞬而已後之亂臣賊子過我宮牆徘徊八磚之間其尙蹶然動心也夫

此事奇甚文以全力注之不覺淋漓盡致

○○文溪映雪菴記

內弟周君令申捐其分祖雪崖公庄居、以爲蘭若、殿閣廂廡丹雘、
雕塑之費二百餘金、置田飯僧、使子弟肄業其中、書聲梵唄唱和、
相聞、庵前名雪山、取釋迦雪山六年精修之義、以勸僧徒、旣而更
名映雪、取孫康映雪五夜讀書之義、以儆後學、蓋一庵而二善具
焉、庵成徵記于余、余乃進諸後學而言曰、旨哉令申之教子弟、其
意深且遠矣、所謂映雪讀書者、不于映雪之時也、蓋有得于映雪
之先者矣、古之學者、時教必有正業、退息必有居學、夫旣以退息
爲學、則退息亦所以爲時教也、是故有所操者、卽有所縱、有所執

者卽有所舍有所爲藏修者卽有所爲息游藉使知操而不知縱
知執而不知舍知藏修而不知息游時教退息判爲二事扞格齟
齬不頗其安豈所語於讀書者哉不觀之畫者乎畫者好欲其專
業欲其勤絹素筆墨欲其不離左右而其精光所注尤在目不觀
絹素身不親筆墨意境俱寂心手兩忘之際若是者不區區于專
且勤之迹而專且勤莫能逾者何則學之所益者人神之所會者
天也天人合而絕技出焉讀書者亦若是焉已矣方其游心于淡
養氣于冲收視而反聽寡慾而息機其于經傳子史百家之蘊固
已深造而自得矣尤且資于山水以增其高深資于花月以生其

然須在深處自得之復才有此境否則玩

○物○我○志○並○足○○內○外○合○一○之○學○哉○
幽○閒○資○于○絲○竹○唱○嘆○以○助○其○風○韻○極○之○而○壯○士○擊○劍○幻○人○吞○刀○風
檣○陣○馬○石○走○沙○飛○雷○轟○電○掣○鷹○盤○鵠○怒○龍○戰○虎○鬪○千○奇○百○怪○莫○不
資○之○以○排○宕○其○胃○臆○而○酣○適○其○意○氣○蓋○無○時○而○非○讀○書○之○候○無○事
而○非○讀○書○之○功○也○若○必○待○握○牙○籤○展○油○素○咕○嗶○于○縹○緗○簡○牒○而○後
謂○之○讀○書○則○其○讀○書○之○日○寡○矣○然○則○孫○子○映○雪○特○孫○子○暫○時○之○事
偶○然○之○景○爲○紀○傳○者○取○之○以○表○其○專○且○勤○之○一○端○而○已○而○後○人○必
於○同○雲○集○霰○壓○梅○折○檜○之○夜○以○爲○孫○子○專○勤○之○所○在○孫○子○之○專○勤
豈○在○是○哉○爲○僧○者○亦○然○蓋○有○朝○華○嚴○夕○般○若○而○失○之○千○里○桃○影○竹
聲○屠○門○酒○肆○或○有○得○之○覲○面○者○矣○我○自○調○心○與○彼○何○與○按○指○發○光○

非關塵勞。以是質之令申映雪之意。其或有合耶否耶。

此題入他人手。必將映雪正面着意發揮。縱極精神。焉能出色。此妙從退息時補出一層。看似翻案。實則壓題。且正深入題之骨裏。而題面只一點便足。非真正讀書人。那得有此行文排宕淋漓。亦極行筆引墨之樂。

○○周孝子割股記

崇禎十年丁丑永新周孝子以割股死。邑侯閔公聞孝子之事，命諸生採實以聞。諸生具狀上言：孝子名光綬，字弱生，西鄉文竹人，爲邑博士弟子。幼有至性。父宏謨，負才以老，鬱悒善怒。箠楚或非其過，綬怡然不敢對。父寢疾，浹年。綬晝夜調藥，坐臥牀側，再拜向醫者乞方。醫知其不治，謬曰：人肉可療也。綬信爲然，割股肉熟而獻之。負痛傷筋，憊甚，寢於別室。父急呼綬，兒安在？綬恐傷父心，聞命踴躍跋而來，血淋漓不止。頃之，父病篤。綬憂痛不能起，遂先其父三日死。年二十有七。當割股時，父不知爲子肉，食之頗快。綬喜。

三

復剖其左臂。家人覺。爭奪其刃。竟以此爲憾云。其生平不具述。述其死孝一事。惟明公察焉。閔公覽狀。置扁旌其闔。且謂貽孫宜記。以志不朽。貽孫旣如言。記之于右。慨然曰。甚矣死孝之難也。當殺死時。人皆謂死而無救於父。不如無死。竊謂不然。文山有言。父母有疾。雖不可爲。豈以不可爲而廢藥。至哉言乎。以爲可爲而圖之。不可爲而置之。此其心寧可問哉。爲子死孝。爲臣死忠。其濟則君父之福也。不濟則以死繼之。死固其分耳。必謂死而無救于父。不如無死。則自古忠臣。獨紀信之死。嵇紹之死。程嬰公孫杵臼之死。與國朝韓成之死。死而全其君。全其孤。庶幾可以死矣。他如死封。

疆社稷諸臣其與日月爭光者其以爲死而無救可以無死乎爲
臣子者不幸而至於死而死之中又有不幸焉君子所以重傷其
志也然則光綬之死其可以解矣綬非不知病之不可爲也彼其
志獨欲爲於不可爲之時每旦焚香籲天祈以身代齋七日自爲
文涕泣而丐于神以爲吾志如此神將據我云爾夫不傷天意之
不可問而但譏孝子不能格天也是猶責屈平不能悟主笑睢陽
不能滅賊而罪信國以不能復宋也豈不惑哉或曰割股不著聖
訓不可爲孝吾謂割股雖不可爲盡孝然終不可以爲非孝且嘗
聞諸光綬家人道其平日孝友事多不愧古人使光綬不死其可

旌者不僅刳股已也。惟不幸而死。死而無救于父。在衆論方以爲愚。方以爲傷勇。而吾獨許之以孝。蓋誠不忍以成敗論忠孝。且以愧天下爲子臣者。可爲而圖之。不可爲而置之以自號明哲焉。豈獨爲光綬地哉。嗚呼。若光綬者。可以死矣。

快論惜不令韓子見之

○顏山農先生傳

先生名鈞、一名鐸、別號山農、中陂人、父應官姑蘇學博、兄鎰、山東新城令、先生生嘉靖間、爲兒時不慧、十九讀孟子、彌日不成誦、顧默坐自如、側聞兄鎰談學、若有會、忽偃臥、夢紫衣人名之帝所、及覺、歛誠左右、毋輒溷我、我將扃戶求我焉、閉闕不食飲者七日、豁○先○悟○然有悟、手辦香鳴鼓而稽首者四、曰嗟乎、吾幾罔吾生、吾適至帝所、然後知覺學、豈易易哉、尋居谷中、九閱月、益大悟、歸見兄鎰等、陳性命之學、皆驚興起、至數百人、值學使者至、父兄迫令就試、先生嘆曰、人生甯遂作此寂寂、受人約束乎、於是始罷舉業、專學矣、○後○學○

會王公艮聚講廣陵間。見先生異之。遂遍遊吳越齊魯燕趙。士大夫就門下。日益多。而所篤信者。參政羅公汝芳爲最。始羅慕道極篤。以習靜嬰病。遇先生在豫章。往謁之。先生一見卽斥曰。子死矣。子有一物據子心爲大病。除之益甚。幸遇吾尚可活也。羅公曰。弟子習澄湛數年。每日取明鏡止水相對無二。今于死生得失不復動念矣。先生復斥曰。是乃子之所以大病也。子所爲者。乃制欲非體仁也。欲之病在肢體。制欲之病乃在心矣。心病不治死矣。子不聞放心之說乎。人有沉疴者。心怔怔焉求秦越人決脈。既診曰。放心。爾無事矣。其人素信越人之神也。聞言不待鍼砭而病

霍○然○已○有○負○官○帑○千○金○者○入○獄○遽○甚○其○子○忽○自○商○持○千○金○歸○示○父○
曰○千○金○在○可○放○心○矣○父○信○其○子○之○有○千○金○雖○荷○校○負○銀○鐺○不○覺○其○
身○之○輕○也○夫○人○心○有○所○繫○則○不○得○放○有○所○繫○而○强○解○之○又○不○得○放○
夫○何○故○見○不○足○以○破○之○也○蛇○師○不○畏○蛇○信○呪○術○足○辟○蛇○也○幻○師○不○
畏○水○火○信○幻○術○足○辟○水○火○也○子○惟○不○敢○自○信○其○心○則○心○不○放○矣○不○
能○自○見○其○心○則○不○敢○自○信○而○心○不○放○矣○孔○子○曰○朝○聞○道○夕○死○可○矣○
放○心○之○謂○也○孟○子○曰○學○問○之○道○無○他○求○其○放○心○而○已○矣○但○放○心○則○
蕭○然○若○無○事○人○矣○觀○子○之○心○其○有○不○自○信○者○耶○其○有○不○得○放○者○耶○
子○如○放○心○則○火○然○而○泉○達○矣○體○仁○之○妙○卽○在○放○心○初○未○嘗○有○病○子○

○說○兩○端○相○有○此○只○說○得○一○邊

○此○語○精○甚○吳○卓○處○集○中○有○放○心○說○與○此○正○同○然○吳○

者又安得以死子者耶。羅公躍然如脫韁鎖。病遂愈。迎歸師事之。甚謹。先生豪宕不羈。輕財好施。揮金如土。見人金帛。輒詆曰。此道障也。索之無問多少。盡以濟人。羅公爲東昌大守。先生來呼之曰。汝芳爲余製棺。須白金。荒取其俸錢。出卽散與貧者。又命之曰。汝芳爲余製棺。須白金。大守故廉。不能更具白金。則蚤起。瞞其尚寢。跪牀下白之。先生詬怒。不得已稱貸以進。取之出。又散與貧者。羅公歸。盱江先生至。羅公爲製美材。贈之。舟次金谿。見門人蔡制沒。無棺。又以與之。及遊京師。相國華亭徐公。首問學于先生。三公以下。望風咨學。先生機辨響疾。雙目炯炯。問難四起。出片語立解。往

往於眉睫間得人元悟。稍遲鈍。卽詬詈。衆相顧錯愕。先生自若也。嘗與諸大儒論天命之謂性。衆方聚訟。先生但舞蹈而出。時蘇公佑督學江西。聞先生名。使人召之。不往。曰。召卽召諸生耳。道人不聞往教也。蘇公益重之。造廬稱謝。聞先生言。不覺下拜。最後巡撫何公遷。二子爭財于官署。相殺莫可解。乃迎先生。至署一月。兄弟不覺抱持大哭。遂相友愛。何公感之。問所欲。先生曰。生平遊江湖。不得官舟。廣聚英材。講學爲恨耳。何公以已舟予之。顧先生性峭直。嘗爲上徐華亭及張江陵書。皆有所指斥。諸公不悅。又與同邑尹大宗伯忤。且有宵人齟齬之者。傳會何公所與官舟事。遂以盜

官舟故。下金陵獄論死。先生被拷掠。囊三木。人謂死矣。羅公竭力周旋。橐餗之暇。問先生憊乎。先生笑曰。嘻。是猶風之過而揭吾衣也。我○自○在○吾何涉焉。凡繫獄三歲。日與諸囚論學不倦。諸囚有啓悟者。獄中嘗白光達園扉外。司寇怪之。羅公亦力爲申救。至以身抵焉。遂得減死。發戍廣西。旣出獄。諸囚百餘人伏地哭哀甚。司寇訶曰。若囚旦暮死不哭。哭顏先生何爲。囚曰。不然。顏先生在獄。吾身如在天宮。今先生去矣。吾無所聞。卽不死猶死耳。先生好談兵。喜奇計。先是將軍俞大猷起校尉。罪當斬。先生一見奇之。請于督府得釋。至是迎先生于軍。先生爲畫策。遂平大寇。上其功。將授以官。先生

恥之。僅免戍歸。益倡道不倦。言必稱堯舜。然見有踽踽涼涼者。輒
鄙而笑之。以此頗爲諸儒所譏云。及年九十。忽聚子弟門人。羅拜
於堂。就枕卒。至崇禎壬申。邑令姑蘇管公德園始請於學使者。祀
之。瞽宗并錄其孫于諸生。而先生之道復存矣。論曰。余聞之邑長
者云。先生事父母最孝。親沒廬墓泣血三年。未嘗見齒。雖逢父
母生忌。祭必哀。兄弟五人。友愛備至。鄉族煦煦。患苦相恤。卽古之
篤行君子。何以踰焉。獨其談論風生。意氣煥發。不爲時流所喜。然
生居僻壤。誰爲師承。乃于夢中驚悟。遂以布衣名動天下。與管東
溟王心齋諸公互相印可。至陶鑄近溪先生爲世名儒。嗚呼。可謂

豪傑之士矣。

先生之學純從悟入較陽明尤頗故日久論定卒不得爲純儒然制欲非體仁之說精甚與孔子告原憲之旨無殊放心之說雖于孟子爲別傳而以之醒俗無異金丹固宜錮疾之立除矣推爲豪傑之士豈不信哉

龍公孝行傳

龍公諱鼎、別號凝齋先生、永新袍陂人。祖諱瑞、娶史氏。瑞夭、史氏年十九、撫孤守節、紡績獨居。族人罕見其面。一老奴供薪水、奴死、則掃葉負甕、以爨孤。長娶婦、生公。二歲而孤。又夭。史氏哭之、兩目盡盲。公幼有至性。五六歲時、能執杖扶盲祖母、行庭除間、不忍暫離。稍長、爲人傭書、易米肉以膳祖母。年老齒落、則嚼飯相哺也。縣令龔公以進士新下車、公持祖母苦節狀上堂、慟哭求旌。龔麾之去。明旦、又持杖來哭。龔以屢哭爲不祥也、怒而杖之。明旦、又持狀來哭。龔感其誠、爲請于院司、旌其門曰貞節。會尹大宗伯修邑誌。

公復持狀哭于宗伯之庭。宗伯憐之。爲史氏列名誌內。且言於有司。歲給米布。終其身。春秋祭譚烈婦。必致胙焉。史氏年九十二卒。公躬負土以葬。公娶楊孺人。無子。生女一人。卽先宜人也。先大夫赴童子試時。公知其不凡。以宜人字之。手授秦漢文十冊。曰。子宜先○生○古○文○之○學○實○胎○子○此咀英茹華於此。勿效他人。止拾時文。餌餌也。先大夫服其言。及余小子就塾。以是書授焉。公老且病。先宜人亦爲嚼飯如公哺。史氏時先宜人奉公及楊孺人合葬。袍陂里磨形。僕夫倦不能成墳。先宜人亦躬負土成之。如公葬。史氏時人咸謂公純孝之報也。公沒後。無長物。止遺史氏臥榻一張。蓋節婦七十餘年冰霜嚴凝之氣。

所棲者男女裸臥其上。容止不戒者必大病。有悍少年挪揄曰：此妄耳。攜婦人寢焉。遂病而死。蓋異事云。貽孫曰：余小子讀蘇公程翁狀而淚潛然下也。一行之善格于皇天，福及孫子，而外孫軾轍以文章享大名，使人至今知有程翁者，軾轍也。今觀我公內行醇備，揆之程翁，不啻過之。彼造物者，既斬其嗣，而外孫如貽孫兄弟，又猥賤闕茸，不能奮其筆舌，使公有聞于世，爲善同而食報異，嗚呼，可傷也已。

文格頗高，結一段尤入神品。

與友人論文書一

○先○生○文○嚴○苦○取○聲○

足下聞吳人之植桑乎。吳人植桑飼蠶。絲繭之利。衣被天下。偶值
儉歲。桑稀蠶彊。見楚人有販繒者。其息三倍。遂拔桑藝麻。舉家織
繒。繒價未售。而蠶業已荒矣。今之爲舉子業者。類然也。章句粗成。
良師教之。範我馳驅。未能卒業。苦其難也。出見獲禽之乘。得之說
遇。輒恨曰。吾師誤我。於是盡棄其學。退自貶損。剽竊苟且。以求弋
獲。究之終不可倖。而學業盡荒。噫。嘻。愚哉。夫文以慊志。非以欺人。
○筆○聲○折○筆○聲○附○如○出○柳○子○厚○手○
也。然而吾慊吾志。天下之明有司。必有共慊其志者。吾且讀書。明
理。自爲慊志之交。以求售于明有司。猶懼其失之。今乃不必讀書。

不○必○明○理○爲○不○必○慊○志○之○文○欲○庶○幾○或○售○於○不○明○之○有○司○而○曰○彼○
所○知○者○不○過○如○是○而○已○假○而○一○旦○遇○明○有○司○又○將○何○以○應○之○乎○夷○
光○鄭○旦○世○之○所○共○美○也○舍○是○而○蓬○首○垢○面○以○號○於○人○曰○吾○且○爲○宿○
瘤○天○下○必○有○好○我○如○齊○王○者○且○又○以○號○于○人○曰○齊○宮○之○所○謂○夷○光○
者○必○宿○瘤○也○則○將○率○齊○國○之○螻○首○蛾○眉○盡○習○爲○蓬○首○垢○面○以○爲○必○
如○是○乃○得○趨○時○而○善○變○可○乎○哉○且○夫○學○焉○而○厄○窮○吾○命○也○不○學○而○
弋○獲○非○吾○命○也○命○或○厄○窮○其○于○吾○學○固○可○無○憾○設○令○吾○命○可○以○弋○
獲○學○者○尚○且○羞○之○又○况○其○必○不○可○以○弋○獲○也○則○亦○何○苦○不○學○乃○欲○
欺○人○以○自○欺○斯○益○惑○之○甚○者○矣○

正喻夾寫一片婆心

○與友人論文書三

制義猶古文也。其相題審脈。排比格調。雖有不同。然其正反開闔。往復轉變者。法也。古文有之。制義亦有之也。其正反之相生。開闔之遞變。往復之不測。轉變之無迹者。巧也。古文有之。制義亦有之也。是以行文有法。而不爲一成之法。其不爲一成之法者。巧之從心。不踰也。行文以巧。而不能自言其巧。其不能自言其巧者。法之範圍。不過也。夫如是。則天下不皆僇也。而法在。則天下皆可爲僇。天下不皆般也。而巧在。則天下皆可爲般矣。今之爲制義者。憚于法之嚴。而託於無法。以爲巧。格于巧之難。又託于無巧。以爲法。則

設有工師于此法猶是法也。然而曲僅能鈎。直僅能繩。圓僅能規。方僅能矩。是賤備也。以是爲法。巧者笑之矣。又有工師於此法。猶是法也。然而執鈎爲曲。執繩爲直。執規爲圓。執矩爲方。是膠守也。以是爲法。巧者又笑之矣。然則將矯直者以中。吾鈎。強曲者以中。吾繩。破方者以就。吾規。毀圓者以就。吾矩。詭僻險怪。陰叛于法之中。而曰是巧也。巧乃與法相斃。而法亡矣。則將以其意爲曲。而廢吾鈎。以其意爲直。而廢吾繩。以其意爲圓。而廢吾規。以其意爲方。而廢吾矩。決裂潰亂。顯悖于法之外。而曰是巧也。法乃與巧相斃。而巧與法并亡矣。凡若此者。皆非吾所謂法。卽非吾所謂巧也。吾

所謂法者。法習而巧出焉。吾所謂巧者。巧至而法生焉。吾所謂法者。可傳而巧者不可傳。吾所謂巧者。不可學而巧之藏于法者。尤不可學。亦惟是養之以靜。致之以虛。廣之以識。主之以誠。優而游之。使自得焉。神而明之。使自由焉。其于文之正反開闔往復轉變也。非作而致其然也。如手足之持行。不言而喻。如耳目之視聽。不戒以孚。如夏雲奇峯。因風生。態如水滌行地。隨物賦形。蓋有無意而合。不知其所以然。而然者矣。若是者。古文之至。而亦制義之至也。奈何望崖而返。而未嘗一涉其域也。

一氣旋轉到底而肌理甚密亦巧法備具之文

。示兒一

作詩乃極苦之境。極難之事。四書本經可窺聖域。舉業文字可致通顯。爲之極樂。學之極易。舍其樂易而趨苦難。是亦不可以已乎。但汝既頻以詩請益。當以乃翁作詩之苦難告汝。吾少不知作詩。見諸大老集有鄙俚應酬詩。輒掩口而笑。自丙子九月。場事失志。時年三十一矣。忽發憤爲詩。殫竭心力。至忘寢食。每得一語。自矜。叙獲不知皆古人所已道者。積累成帙。謬付梓人。爾時同社皆不知詩。妄相獎許。推爲詩人。如是者五年。始知慚愧。取而刪竄。其半因得稍進一格。然尙在古人堂下。輒詡詡得意。自謂入室。如是又

五年復知慙媿。又取而刪竄其半。時值國變三灾並起。百憂咸集。饑寒流離。逼出性靈。方能自立堂奧。永叔所謂窮而後工者。其在此時乎。及平心靜氣。取古詩與吾詩比勘。慙媿又起。自嘆辛勤半生。求其集中如唐人詩。或有相合者。求三百篇。勞人思歸。天懷日放之妙。十首之內。不得二三。又况能頡頏雅頌。奏清廟而被管絃乎。因羨唐人如陸敬輿。李習之輩。不以詩名。宋人如曾子固。陳同甫輩。不能爲詩。彼不走苦難一路。所謂良工不示人以瑕也。蓋作詩貴悟門。悟門不在他求。日取三百篇及漢唐入佳詩。反覆吟詠。自能悟入。若無悟門。但于古詩及漢魏晉唐人詩內。聲容字句摹

擬描畫如在琉璃屏外拍美人肩。雖表裏洞見。然所拍者終是琉璃。不是美人。若舍三百篇漢魏晉唐而別尋悟門。如涉江海者。本無神通。漫學折蘆浮杯捐棄舟航。凌空飛渡。此兩種病。近代名家往往有之。然悟門不能遽開。積累時日庶幾一朝遇之。汝詩疵處。吾姑不爲汝指出。待汝知慚媿時。自當別白。知慚媿別白。則悟門開矣。若作舉業文字。閉戶三年。便可博科目。何須積累時日。且近日科目文字。多以無慚媿無別白得之。又何待悟門乎。汝今非發憤爲詩之時。又無牢騷鬱憤之事。遽欲窺身苦趣。譬無事人自着枷鎖。投入犴狴。殊爲可惜。倘知汝父作詩如此苦難。自當廢然而

返也。

前幅現身說法以見其難中間指出兩般病痛以示之路其文亦如彈絲吹竹足移我情

○ 復程天修

宏慈至知兄入廬山讀書與枯禪爲伍精專如此鬼神避之矣獨弟夙在先人庇廕之下雖廉吏子孫然比之寒士差爲有間於是時惜陰自愛而於世味取其近厚者於事境取其近甘者於讀書作文取其近逸者以無涯逐有涯疲有用於無用倏忽二十九歲遂如旦暮今先君先祖沒不肖多病之軀驟膺大故老母幼弟相依爲命家務外事補苴支吾日不暇給蓋造物之薄我苦我勞我遂若此其極也而弟尚不知返以爲是厚者與夫甘且逸者可以久處不遷也譬之盛暑入涼亭倚修竹以永歲月忽然霜隕泉涸

冰堅龍見猶服絺綌揮團扇不自知寒威之逼體也昔人咎文之不進必曰俗務紛心天分有限弟弱冠荒廢學殖未落豈敢歸咎天分而獨懼俗務之日來也先祖先父丘隴松楸稍已經營兩弟亦漸畢婚聘外侮內患差可銷彌薄田百畝付之僮僕能者自此而後亦欲遊匡廬登衡嶽觀潮汐於浙江探波濤于彭蠡以發吾文章之奇以與天下後世相見以不負吾祖父永訣叮嚀之言耳噫亦晚矣越人有以呼盧失業者猝見波斯海船木難火齊洞心駭目方撫膺涕泣乞其小磯碎玉執盤匱搖發鼓博百千文錢以救饑寒可不悲哉弟今且爲越人矣不知波斯老賈其尚矜而助

之○耶○其○任○其○潦○倒○博○場○迫○至○悔○恨○憬○悟○然○後○乞○其○緒○餘○耶○其○必○能○
擇○一○以○居○於○此○矣○

追悼前失俯望後修厲志冲襟皆可得之筆墨之外

○與周白山

兩漢唐宋詩人文人。前唱後和。異代名家。遞爲師承。同時作者。互相激揚。有相長之益。無相傾之習。何其盛也。近世不然。何李兩人。旣已矛盾。而應德遵巖諸公。復與元美于鱗。門戶角立。其後公安。竟陵出。掃前賢而空之。虞山繼起。欲掩公安。竟陵之勝。彈射詆訶。更無虛日。當其拔幟樹幟。輒令學者從風。而靡旣而風。會遞變議。○自○明○代○以○至○于○今○學○術○文○章○皆○如○此○矣○論迭新。人情厭常。各矜剗獲。彼幟方立。此幟已奪。嗚呼。每一詩文。人出。必求掩乎前之人。彼董揚班晁。賈陶謝庾。韓柳李杜。豈能至今存哉。才非兼長。學無條貫。各以其長攻人所短。其彈射前人。愈

巧○其○不○及○前○人○愈○甚○譬○之○一○音○成○響○難○諧○眾○器○一○味○獨○賞○遂○廢○人○
珍○豈○知○鈞○天○之○樂○賁○鼓○維○鏞○無○嫌○笙○磬○大○官○之○庖○甘○酸○辛○鹹○並○滋○
淳○熬○也○哉○可○慨○也○矣○雖○然○今○日○之○文○更○有○難○言○者○焉○孤○處○巖○谷○獨○
寤○寐○歌○求○賞○鑒○之○人○不○得○求○詆○訶○彈○射○之○人○亦○不○得○此○又○世○運○之○
生○之○意○者○所○以○不○能○大○行○乎○時○遞○降○文○運○之○遞○衰○可○爲○痛○哭○流○涕○長○大○息○者○也○

此文可作明代藝文志總序愈老愈鍊愈簡愈該較之作史論
時如出兩手矣

509

得復札云。場中文宜假不宜真。且以不佞持論太真。少時應舉。幾
雋復失。及前輩名士下第。皆爲舍易趨難。認真太過。所誤竊謂不
然。凡天下之事。假難而真易。真屬天機。假因人力。以人力而奪天
機。是豈容易能之乎。里中有老優者。嘗爲不佞述其爲優五十年。
其視起居飲食對妻子。酬賓友。無一事而非劇場。及其登場。則又
如身在離合生死榮辱得失之內。自爲悲喜啼笑。與觀劇者同爲
悲喜啼笑。不敢以輕心居之。怠氣應之也。吾友龍仲房少以畫牛
得名。嘗裸逐牛隊。學其鬪角磨癢。嚙草眠雲之勢。居然牛也。人皆

知劇場非真境。畫牛非真牛矣。而不知優人不真。則戲不成。畫牛不真。則似不顯天下極假之事。必以極真之功力爲之。豈可以讀書作文極真之事。反視以爲假。藐以爲易乎。不佞少時畏假之難。不敢爲假。非止於不欲爲假也。足下乃謂假易而真難。以先輩名士不第爲捨易趨難。捨假趨真之誤。竊恐足下以此自誤。彼先輩之言。未嘗誤足下也。倘或執剽竊庸陋以爲假。以爲易乎。則但取空疎不學。卽爲科名捷徑。時文秘訣。倡此論者。誤天下後世愈甚。又不獨足下自誤已也。

妙論得未曾有。真易假難。天下事皆然。然非箇中人則道不出。

自書近詩後

喪亂以後。余詩多哀怨之旨。或謂詩以陶其性情耳。如子所吟。是亦不可已乎。余應之曰。此乃吾所以陶寫也。憶昔年避亂禾山。有老父夜半叩牀而歌。其嫗詈曰。汝妻子不食三日矣。汝不知哭。夜半嘔啞何爲乎。老父笑曰。吾以歌爲哭也。彼父老以歌爲哭。吾以哭爲歌。凡哀樂顛倒之事。皆性情所適耳。壯士之戰而怒也。適於喜。美人之病而顰也。適於笑。然則溺人之笑。未必非溺人之適也。吾求吾適而已。若并吾哀怨而禁絕之。亦不適甚矣。後之觀是集者。倘不以吾爲哀怨。而以爲吾適焉。則吾詩或可比於溺人之笑。

也。

以歌爲哭以哭爲歌此種幽懷在老父不知何所爲而來在水

田居士不知何所爲而至令人自領

原評

族姪小琮墓誌銘

君諱如珩字小琮世爲龍田賀氏厥考良吾妣某氏以萬曆某年
月日生君娶某氏生子一人勒彝孫一人腴甲子舉江西鄉試曾
孫三人某某尙幼以戊午某月日卒壽七十有八祔葬祖塋某山
至乙丑仲夏余始爲文誌其墓按族系君於余爲姪以其齒尊而
行高故稱之曰君君幼讀書知大義爲人剛直重然諾遇事慷慨
義形於色伯兄瑞海與里中無賴生有郤值丙戌搶攘之秋有稱
姚將軍者縱兵剽橋頭多殺無辜以示威無賴生竄身姚幕構瑞
海以死法逮騎數十蜂擁入門君謂瑞海曰兄年五十未生子宜

遠○避○以○存○宗○祧○吾○有○一○子○已○弱○冠○能○樹○立○善○文○章○矣○吾○願○代○兄○雖○死○無○恨○遂○出○就○縛○械○至○營○榜○掠○數○百○殊○死○無○所○言○無○賴○子○手○示○姚○曰○瑞○海○挈○家○遁○矣○此○其○弟○小○琮○也○姚○怒○叱○曰○汝○敢○冒○瑞○海○誑○我○今○當○烹○食○汝○若○告○瑞○海○匿○處○則○貴○汝○死○君○哭○曰○吾○兄○何○罪○吾○旣○以○身○代○矣○復○何○求○哉○姚○怒○摔○君○至○堂○下○揮○刃○將○斬○之○姚○之○父○亟○止○曰○此○囚○有○義○之○人○宜○釋○之○無○賴○生○復○教○姚○曰○勿○釋○也○瑞○海○殷○富○第○刑○其○弟○勒○令○輸○餉○三○百○金○可○立○致○也○姚○果○下○令○比○餉○是○時○君○體○無○完○膚○矣○聞○令○自○度○必○死○會○洪○都○變○起○姚○引○兵○宵○遁○君○得○脫○歸○瑞○海○亦○得○歸○抱○君○頸○哭○曰○弟○爲○吾○受○毒○痛○極○矣○出○田○券○授○君○曰○弟○貧○乏○產○吾○

今以八十畝爲弟產。君笑曰：吾甘貧久矣，豈爲吾兄市義哉？固辭弗受。四方君子翕然稱曰：賢哉賀小琮，爲兄犯難忘死，有古豪傑之風也。其後瑞海連生數男，至戊申瑞海卒，向之五十年無子者，至是斬衰繞喪而拜，遂有丈夫四人矣。而君止一子，勒彝，向所謂弱冠能樹立善文章者，不幸短命而亡，僅遺孤孫腴，惇惇弱息，未離乳哺。君朝夕襁抱，呼天長號，五臟崩裂，白髮黃口，二命相依。人或疑天福善人，至君而爽。及孤腴稍長，發憤讀書，蔚然露頭角。君乃喜曰：吾有孫矣。丁未孤腴出就試，爲文風發泉湧，有司見而奇之，拔爲第一。遠近爭傳誦其文，聲名鵲起。君益喜曰：吾有孫能竟

一、轉出于意外

吾兒勒彝未竟之志矣。戊午春，學使者按郡，君尚無恙，命朕趨赴試。試畢，朕忽心動，踉蹌奔歸。而君果得微疾，終已就棺殮矣。爾時代朕奉湯藥，視飯含，經營附身附棺之具，惟謹。使朕不以離憂抱恨者，則瑞海之次男聞子也。甲子春，學使者錄科，朕居第一。是秋棘闈榜發，朕以壁經魁江西。既歌鹿鳴，歸而捧賢書，拜跪獻爵于君之墟墓。人方信君果有孫，能竟厥考勒彝未竟之志，且信天福善人果至君而不爽。而君之孫則涕泗沱若傷君，溘然先逝，不及一日以甘旨養也。雖然，君有孫如此，功名所竟，未有涯量。天之福報善人，亦未有涯量。余所感嘆者，瞬息四十年，而人事險易，天道

平陂。遂如轉環。爲善者可不勉哉。乃爲之銘曰。捐身拯兄。身乃長存。捐生取義。生乃彌尊。惟孝惟友。純嘏之門。不憑其子。而祐其孫。天之所祐。歷久而敦。我勒此石。百世猶溫。篤爾行常。沃爾蘭蓀。只委曲敘此一事。中間攢簇作頓處。絕世文情。

○曹娥叔先雄兩孝女辨

東漢時上虞孝女曹娥父盱爲巫以五月五日迎婆婆神溺死不得屍娥年十四沿江號哭晝夜不絕十有七日遂投江而死當時又有孝女叔先雄亦以父泥和溺死不得屍先雄於父墮處慟哭投江死見夢於弟賢云後六日當共父出至期果與父相抱浮於江上兩孝女之投江一也先雄之魂獨出父屍於水而娥不能何哉凡忠孝之事皆可感天地而動鬼神然有可必有不可必者天地鬼神所爲不測也使人皆得而測之則天地鬼神幾於褻矣子胥之忠能怒錢塘之濤而汨羅之水不能爲靈均起波靈均豈以

此貶忠哉。光武詔問劉昆，前存江陵，反風滅火，後守宏農，虎北渡河，行何德政而致是異？昆對曰：「偶然耳。」夫天人相與之際，孰有深于偶然哉？使爲吏者必欲得渡河之虎，滅火之風，則循良之實反成誕罔之名，豈不大可厭哉？故抱屍浮江之事，亦偶然也。偶然者爲奇，常然者爲庸。孝庸德也，叔先雄自爲其庸者耳，豈以偶然之奇與曹娥較優劣哉？

近世刊孝行錄者，必有靈奇怪幻之事，予見之輒厭，曷不讀先生此文。